

Corosu norĩ
Corosu norĩ ma, Paru te te
ĩrob'ui'érézé
Ĩbaihâ wasu'uzé

Paru hã darob amoi âma dazazéb 're hâimana sirômo, ma tô rowasu'u hã wapa, Zezusihi zazei'wa norĩ ma, roti senai'ô na da te tâma 're ĩrowasu'u za'ra mono zém na hã, Corosu âma 're ĩsi'ubumroi mono norĩ ma hã. Taha wa, Paru hã ma tô Corosu norĩ ma rob'ui'éré za'ra, roti senai'ô wi, te te uwati za'ra da. Ma tô duré tâma roti za'ra, Zezusi hã apâ te te saze za'ra da, Epaprasi hã ĩmorĩ'rata na te te tâma ĩwaihu'u za'ra zéb zarina. Epaprasi hã Corosu âma ĩsazei'wa norĩ 'madâ'â'wa, ta hã. Paru hã ma tô duré tâma waihu'u za'ra, âne: Zezusihi si siminho'reptu waihu'u pese di. Duré taha si dawasédé hã te te dama 're apari waihu'u pese mono di.

1-2 Wa hã Paru, Cristu Zezusihi zadawa wasu'u'wa, wa 're ĩhâimana, 'Re ĩhâimana u'âsi mono te te sima ĩwēzéb zarina. Taha wa, wa âma aima rob'ui'éré za'ra wa'wa, Corosu na 'ri nho'ômo nhisi âma 'Re ĩhâimana u'âsi mono nhib'a'uwē 're aihâimana za'ra wa'aba mono norĩ ma. Wasisânawā Timotiu te duré âma asawī za'ra wa'wa. A norĩ wa'wa hã te oto wasiré wasisânawāi wa, 're anomro wē wa'aba mo Cristuhu âma si, tiwi 're aipizari za'ra wa'aba mono âna.

Wamama ma, wa ai'âma 're ĩmreme u'âsi za'ra wa'wa, 'Re ĩhâimana u'âsi mono ma, ĩsimizawizé hã

ai'ãma 're hâimana u'âsi za'ra wa'aba mono da,
rowê u'âsi, ãma 're anomro aba mono da.

*Paru hã 'Re ãhâimana u'âsi mono ãma ãwatazé
wasu'u*

³ 'Re ãhâimana u'âsi mono ma, ai'ãma 're
wamreme zusi aba mono sidâpâsi, wa ãma 're
wawata u'âsi za'ra, Wanhîb'apito Zezu Cristuhu
mama ãma hã. ⁴ Cristu Zezusihi si asina 're
ĩ'umnhasi za'ra wa'aba mono zé wasu'u hã, duré
uburé 'Re ãhâimana u'âsi mono nhîb'a'uwê 're ãsawi
pese za'ra wa'aba mono zé wasu'u hã wa te 're
wapari za'ra mono wa, wa ãma 're wawata u'âsi
za'ra, 'Re ãhâimana u'âsi mono ãma, ãne na oto 're
aihâimana wê za'ra wa'aba mono wa. ⁵ Cristuhu
wasu'uwê hã tô sena uptabi hã ãmorĩ'rata na da
te atême ãwisi za'ra wa'aba wamhã, tame ma tô
ãwapari na'rata za'ra wa'wa, ãwê uptabi hã hãîwa
ãma dazô 're ãsimi'wara mono zé wasu'u hã, duré
taha zô si 're ãdanhîmipari u'âsi za'ra mono zé
wasu'u zama. Taha zô asina 're asimipari za'ra
wa'aba mono zéb zarina, ma tô Cristuhu si asina
're ã'umnhasi pese za'ra wa'aba mo. Taha zarina
ma tô duré 'Re ãhâimana u'âsi mono nhîb'a'uwê
norĩ hã 're ãsawi pese za'ra wa'aba mo. Hãîwa
ãma, wê uptabi na asô 're ãsimi'wara aba mono
hã, te tô 'Re ãhâimana u'âsi mono hã te te asô 're
'madâ'â pese za'ra wa'wa. Taha zô si te tô asina
're asimipari u'âsi za'ra wa'aba mo. ⁶ Cristuhu
wasu'uwê hã ma tô da te ãma ropé oto, ropâ. Taha
wa, ma tô ãsazei'wa norĩ hã dasina tahâ'â ni oto.
Taha wa, ma tô dahâîmanazém na da te 're saprĩ
za'ra, ãwê u hã. Tane ma tô duré ãwasu'uwê hã
aima 're hâimana za'ra wa'wa, ãwapari na'rata za'ra
wa'aba zém hawîmhã. Tame ma tô oto ãwaihu'u

za'ra wa'wa, tô sena na 'Re ãhâimana u'âsi mono te te 're ãda'azawi pese mono zém na hã. ⁷ Epapراسيhi nhimirowasu'u zarina, ma tô ãma ãwaihu'u za'ra wa'wa. Ta hã Cristuhu ma wasiré romhuri'wa, wama ãsawi pe hã. Simi'ẽ na te Cristuhu ma, te te ai'ãma 're romhuri pese za'ra wa'wa, wa'upana. ⁸ Ta hã ma tô wama aiwasu'u wẽ za'ra wa'wa, 'Re ãhâimana u'âsi mono pẽ'ẽzani te te 're aipawaptob za'ra wa'aba mono zéb zarina, asimizawi pese zé hã oto ãwaihu'u za'ra wa'aba zém na hã.

⁹ Taha wa, aiwasu'u wẽ hã wa te ãwapari na'rata za'ra wa'aba zém hawim haré, wa tô õne u'âsi ai'ãma 're wamreme zusi u'âsi 'wa, 'Re ãhâimana u'âsi mono ma. Ta hã te te sima 're aiwẽ za'ra wa'aba mono zéb uwaibaba, niha oto ãma 're aihâimana za'ra wa'aba mono da, duré te te aima 're waihu'u za'ra wa'aba mono da, wa tô wa te tiwi aima 're rowaptẽrẽ u'âsi za'ra wa'wa. ãpẽ'ẽzani hã te za tô te te 're aipawaptob u'âsi za'ra wa'wa, hãwa hawi dahâimanazém na rowaihu ãwẽ uptabi hã oto ãma waihu'u za'ra wa'aba da, taha zarina 'Re ãhâimana u'âsi mono te te sima 're aiwẽ za'ra wa'aba mono zé hã asina 're waihu'u za'ra wa'aba mono da oto, 'rãwi. ¹⁰ Tawapsi, te za Wanhíb'apito zazei'wa hâimanazéb zarina 're anomro wẽ wa'aba mono zém na, tãma ãma asina 're ãuwaimrami za'ra wa'aba mo. Marĩ ãwẽ si 're 'manharĩ za'ra wa'aba mono wamhã, Wanhíb'apito hã te za toi uptabi na aihâimanazém na te te 're ai'uzei pese za'ra wa'wa. Tawamhã 're aihâimana wẽ za'ra wa'aba mono zém hawi, te za tô marĩ 're ã'manharĩ wẽ za'ra wa'aba mono zém na asima 're ãsa'etẽ za'ra wa'aba mo. Tawamhã 'Re ãhâimana u'âsi mono hã ãwaihu'u za'ra wa'aba zém na te za duré asima 're ãsa'etẽ za'ra wa'aba mo, asi'uihã na. ¹¹ Wa duré wa te tiwi

aima 're rowaptērē u'âsi za'ra wa'wa, 'Re ãhâimana u'âsi mono wî hã, tiwaihu'u pese na ãwē uptabi na si te te 're aipawaptob za'ra wa'aba mono da, asiptete u'âsi ãma 're anomro aba mono da, taha na si. ãne wamhã, te za tô ato sina asiptete sina ãma 're anomro aba mo. Duré ãne wamhã, uburé marĩ na 're robzépata za'ra wa'aba mono nherē, asa dama ãma 're wa'rãmi za'ra wa'aba mono õ di za. ¹² ãne wamhã, Wamama ãma te za duré ãma 're aiwata u'âsi za'ra wa'aba mo. Ta hã ma tô aima pisutu za'ra wa'wa, hãwa ãma tinhĩb'a'uwē norĩ ma, ãwē uptabi hã te te sô 're ã'apisutu mono hã aima wa'aba zama aima 're hãimana za'ra wa'aba mono da dasine, da'ãma 're ãsib'a'uwē mono zéb ãma hã rowa'a za'ene 're ãsa'wari u'âsi mono ãma hã. ¹³ Ta hã ma tô wa'anho'reptu tô, robra hawĩ, Satanasihi nhiptetezém hawĩ. Ta hawĩ ma tô te te 're wa'awaibu, ã'ra nhimi'madã'ã si oto tãma 're wahãimana za'ra mono da, tãma ãsawi uptabi nhimi'madã'ã si. ¹⁴ Ti'ra dã'ázém na ma tô wa'awa'ã, marĩ wa te 're ã'manharĩ wasété za'ra mono zé hã te te wama 're apari mono da, taha zarina wawasédé hã te te wa'ãma 're ab'madã'ã tô mono da oto.

Cristu hã 're ãhãimana mono zé wasu'u

¹⁵ Cristu hã 'Re ãhãimana u'âsi mono ne, te tô 're mo, aiwa wa. Tane nherē, 'Re ãhãimana u'âsi mono hã datômo na da te dasiwi 're 'madã'ã waihu'u za'ra mono õ di. ã'ra si ma tô da te dasiwi 're 'madã'ã za'ra datômo na, ti'a 're morĩ ré hã. Ta hã duréihã marĩ õ uptabi ré hã, te tô 're hãimana u'âsi, ã'ra hã. Uburé ropoto nhipai u, te ta hã pire uptabi na 're hãimana. ¹⁶ Õhõ si ma tô Timama zadawa para uburé marĩ hã te te apoto, hãwa ãma, duré

ti'ai âma zama, datômo na da te 're ã'madâ'â za'ra mono hã, duré da te 're ã'madâ'â waihu'u za'ra mono ô zama. Uburé hãwa nho're âma dapore'ô norĩ ma simiroti pire na 're ãhãimana za'ra mono norĩ zama ma tô te te apoto, ãhãiba'ô norĩ hã. Uburé marĩ hã taha ma si 're hãimana za'ra mono da, ma tô te te ro'apoto tô, Timama zadawa para. ¹⁷ Cristu hã ône u'âsi te tô 're hãimana, marĩ ô uptabi ré hã. Ta hã te uburé marĩ hã tinhimipoto mono bâ te te 're atété tiwaihu'u pese na, si'wa'rutu na tiwi 're hãimana za'ra mono âna, tãma 're hãimana za'ra mono da, simisutu. ¹⁸ Ta hã uburé tizazei'wa norĩ 'madâ'â'wa te 're hãimana, pire uptabi na. Ta hã dapisutu'wa, 're ãdapoto téb za'ra mono zéb da hã. Dâ'â nherẽ, apã hãwa'utu wa, te oto dama pire na 're hãimana u'âsi, uburé za ãdahãwa'utu za'ra norĩ nhipai u. Taha wa, te oto danhipai u pire uptabi na 're hãimana tô. ¹⁹ 'Re ãhãimana u'âsi mono hã te te sima ãwézéb zarina, ma tô ti'ra hã pisutu, ãsine uptabi 're hãimana mono da, aiwa. ²⁰ Ma tô duré sima âma roti siro, ã'ra hã wedepo'o nhonhi'rãmi na dazada ãdã'ázém na oto da'ãma 're siwadi mono da, uburé hãwa âma 're ãdahãimana za'ra mono norĩ âma hã, duré uburé ti'ai âma 're ãdahãimana za'ra mono norĩ âma zama.

²¹ A norĩ wa'wa hã ma tô aré 'Re ãhãimana u'âsi mono nhiti si 're anomro aba mo, aipẽ'ẽ 're wa'aba hã. Asitob'ru na ma tô âma 're ãrosa'rata za'ra wa'aba mo aré, aipẽ'ẽ 're marĩ ãwasété na si asima 're rosa'rata za'ra wa'aba mono wa. Duré marĩ ãwasété si 're 'manharĩ za'ra wa'aba mono wa, ma tô aré ãsiti 're aihãimana za'ra wa'aba mo. ²² Tane nherẽ, ã'ra hã dasiré a'uwẽ hãba na dazada ãdã'ázéb zarina, te oto ai'ãma 're siwadi za'ra wa'wa, romhutu'ômhã sisô're te te asôré

wa'aba da, aiwasédé hã da te ai'ãma sa'ra waihu'u
 aba õ wa za tamemhã oto, Cristu hã tidâ'âzém na
 aiwasédé te te aima 're ã'apari aba mono zéb zarina.
²³ Taha wa, õne haré te za Cristuhu wasu'uwẽ
 si asina 're ã'umnhasi za'ra wa'aba mo asiptete
 sina, 'ri hã êtẽ nhisiwi siptete na 're sa mono
 wa, simeï waihu'u õ na 're ãsa mono ne. Te za
 tô âma 're aihâimana u'âsi za'ra wa'aba mo, tiwi
 asina 're aipahã za'ra wa'aba mono âna. Ìmorĩ'rata
 na Cristuhu wasu'uwẽ hã wapari na'rata za'ra
 wa'aba wamhã, ãwẽ uptabi hã hãïwa âma asô 're
 ãsimi'wara aba mono wasu'u wĩ, tiwi asina 're ai'rẽ
 za'ra wa'aba mono õ di za, sô 're asimipari za'ra
 wa'aba mono wasu'u wĩ hã. Æhã wasu'uwẽ hã
 ropã ma tô da te dasima 're wasu'u za'ra, da te 're
 waihu'u za'ra mono da. Duré wa hã Paru, wa ãhã
 wasu'uwẽ na te dama 're romhuri u'âsi.

*Paru hã ãsazei'wa norĩ te te 're ãpawaptob za'ra
 mono zé wasu'u*

²⁴ Wa hã ai'udâna za'ra wa'aba, te ai'ãma 're
 robzépata za'ra wa'aba mono nherẽ, wa ãto sina 're
 ãhâimana. Cristuhu ma si, te 're romhuri mono wa,
 wa tô te 're robzépata za'êtẽ tô, ta hã ti'ai âma 're
 morĩ ré, dazada te te ãrobzépata ne. Tane nherẽ,
 Cristuhu nhib'a'uwẽ norĩ ma, ãnhimiromhuri na
 te tâma âma 're uwaimrami mono da, wa za tô
 taha na te 're robzépata u'âsi. ²⁵ 'Re ãhâimana u'âsi
 mono hã ma tô ãpisutu, ãsib'a'uwẽ norĩ te tâma 're
 apawapto mono da. Ai'udâna za'ra wa'aba te 're
 romhuri mono da, ma tô romhuri hã ãma tisõ,
 uburé ãsadowa wasu'uwẽ na te aima 're rowasu'u
 za'ra wa'aba mono da. ²⁶ Æhã wasu'u hã 'Re
 ãhâimana u'âsi mono, ãsãna'rata hawimhã te te aré
 dama 're ã'awaihu'u mono õ hã ma tô oto sô'awi

dama upsibi nhamra, tinhib'a'uwẽ norĩ ma si. ²⁷ 'Re ãhâimana u'âsi mono hã ma tô sima âma roti, ãhã wasu'u hã ãwẽ uptabi hã aré da te 're ãwaihu'u za'ra mono õ hã te te oto dama awasu'u hãiré da sô'awi, dapoto mono bâ da te oto 're waihu'u za'ra mono da, zudezu'õ norĩ zama. ãhã wasu'u hã aré da te 're ãwaihu'u za'ra mono õ hã, ãne: Cristu hã te oto aipẽ'ẽ 're, 're sãmra za'ra wa'wa. Taha wa, te za tô taha zô si 're asimipari za'ra wa'aba mo, 'Re ãhâimana u'âsi mono, ãwẽ uptabi hã za te te wama 're ãapisutu mono zô si. ãne 'Re ãhâimana u'âsi mono wasu'u hã, ã hã aré da te 're ãwaihu'u za'ra mono õ hã.

²⁸ Taha wa, Cristuhu si wa oto wa te dama 're wasu'u za'ra. Hãwa hãwã dahâimanazém na rowaihu ãwẽ hã wa te 're ãwaihu'u za'ra mono zéb zarina, wa tô wa te 're da'uwati wẽ za'ra dahâiba mono bâ, marĩ hã da te 're 'manharĩ wasété za'ra mono tã da. Wa tô duré wa te dama 're roti za'ra, marĩ da te 're 'manharĩ wẽ za'ra mono da, ã'uwaibaba si. Ni'wam norĩ hã Cristuhu âma prédup sina 're ãnomro mono norĩ hã 'Re ãhâimana u'âsi mono nho're u, wa te 're simroi mono da, wa tô ãne hã wa te dama 're roti za'ra, rosa'rata wẽ hã wa te oto 're ãwaihu'u za'ra mono zém hãwimhã. ²⁹ ãne da, wa tô 're ãsi'wapéi u'âsi, ãnhiptete sina te tãma 're romhuri mono da. Cristu hã tinhiptetezé te te ãma 're sômri mono wa, wa ãré te âma 're romhuri pese, taha na si 're ãnhiptete uptabi mono wa.

2

¹ Wa hã wa ãsima wẽ ãne hã, te ai'ãma 're ãromhuri pese za'ra wa'aba mono na asiwi ãwaihu'u za'ra wa'aba da, ãhãiba pibu za'ra wa'aba õ nherẽ. Duré Radiseza na 'ri nho'õmo nhisi âma ãsazei'wa norĩ

're ĩsi'ubumroi mono norĩ âma te 're ĩromhuri pese mono na asiwi ĩwaihu'u za'ra wa'aba da, wa duré ĩsima wê, daro mono bâ ni'wam norĩ âma te duré 're ĩromhuri pese mono na zama, uburé te te ĩhâiba pibu za'ra ô norĩ âma hã. ² Ta norĩ hã tipê'êzani wê ré, siptete sina 're hâimana za'ra mono da, wa tô te âma 're romhuri pese za'ra. A norĩ wa'aba âma zama wa tô duré te 're romhuri pese, aipê'êzani wê ré asiptete sina 're aihâimana za'ra wa'aba mono da. Taha wa, te za 'râwi simisutu siré 're hâimana za'ra ta norĩ hã, 're ĩsisawi pese za'ra mono zéb zarina. A norĩ wa'aba zama te za duré âne zarina simisutu asiré 're aihâimana za'ra wa'aba mo. Tawamhã, 'Re ĩhâimana u'âsi mono wasu'uwê hã aré dama ĩwaihu'u'ô hã te te oto waihu'u pese za'ra wa, te za tô sena na te te 're waihu'u za'ra, a norĩ wa'aba zama. 'Re ĩhâimana u'âsi mono wasu'u hã aré dama ĩwaihu'u'ô hã, â hã Cristuhu wasu'uwê, te dama wasu'u. ³ Cristu hã rowasu'u aré dama ĩwaihu'u'ô na 'Re ĩhâimana u'âsi mono nhimiroti wê wasu'u waihu'u'wa, ta hã. Êtê'ubuzi ĩwa'âbâ za'êne hã ti'ai 'rowi 're simi'wara mono nherê, da te oto 're ĩsôpêtê za'ra mono ne, ma tô Cristu hã te te dama 're wasu'u hâi'ré sô'awi, 'Re ĩhâimana u'âsi mono nhimiroti wê wasu'u hã.

⁴ Ni'wam norĩ hã roti senai'ô na taré te te aima 're ĩrowasu'u za'ra wa'aba mono hã wapari ze nherê, âma 're saze za'ra wa'aba mono tô da, wa âne na aima nharĩ za'ra wa'wa. ⁵ Ai'rata ĩnhamra aba ô nherê, ĩpê'ê na wa tô te ai'âma 're rosa'rata u'âsi za'ra wa'wa, 'râwi asiré 're ĩhâimana za'ra wa'aba mono ne. Cristu hã asina 're ĩ'umnhasi za'ra wa'aba mono zém na, simisutu asiré 're aihâimana nhiptete za'ra wa'aba mono wa, wa ai'âma 're ĩtoi u'âsi za'ra wa'wa, romhâ na nherê.

Cristuhu âma 're îdanomro mono zé wasu'u

⁶ Taha wa, Cristu Zezusi hã Asib'apito za'ra wa'aba na 're saze za'ra wa'aba mono wa, ma'âpé simisutu îsiré âma 're aihâimana u'âsi za'ra wa'aba mono za, 'râwi. ⁷ Rowede hã sari pa na 're simasa mono wamhã, 're sina waihu'u mono ô di. Tane duré a norĩ wa'wa hã Cristu te te 're î'aipawaptob za'ra wa'aba mono zéb zarina si, te za aihâimana nhiptete sina âma 're aihâimana za'ra wa'aba mo. Tawamhã taha si asina 're î'umnhasi za'ra wa'aba mono zém na te za asima 're îsa'êtê za'ra wa'aba mo, Cristuhu wasu'uwê na tô sena da te aima âma 're îrowasu'u za'ra wa'aba mono zéb zarina. Te za duré âma 're aiwata u'âsi za'ra wa'aba mo, 'Re îhâimana u'âsi mono âma, Cristuhu nhimipawapto-bzéb zarina.

⁸ Taha wa, te za 're asi'madâ'â pese za'ra wa'aba mo, dasi'uihã na senai'ô na danhimirosa'rata nhipese na da te aima 're roti za'ra wa'aba mono wamhã, âma 're dazaze za'ra wa'aba mono tô da, tô sena newa taha âma si 're aihâimana za'ra wa'aba mono tô da. Ni'wam norĩ hã danhimiwada'uri zarina pawâ'âbâ âna te te dama 're îromhuri za'ra mono ne, robzei'ô na apâ 're aihâimana za'ra wa'aba mono ô'umnhasite, te za dawî 're asi'madâ'â pese za'ra wa'aba mo. Danhimirosa'rata nhipe hã Cristuhu hawib ô di. Dahi'rata sidâpâsi tô senai'ô na taré da te dasima 're îroti za'ra mono zém hawimhã ta hã, duré îhâiba'ô norĩ hã wasété uptabi na 're îhâimana za'ra mono norĩ hã ropâ siptete sina marĩ te te 're î'madâ'â za'ra mono hawimhã, danhimirosa'rata nhipe hã. ⁹ Cristu hã ti'ai âma a'uwê hâiba na 're morĩ ré, te tô 'Re îhâimana u'âsi mono ne 're hâimana, aiwa uptabi wa. Taha wa, marĩ zô tiwi 're rowaptâ'â mono ô di, Cristuhu wi

hã. ¹⁰ Tane duré a norĩ wa'wa hã, Cristuhu âma 're anomro aba mono wa, marĩ zô aiwi 're rowaptâ'â za'ra wa'aba mono õ di, rowẽ na âma 're ï'anomro u'âsi aba mono zéb da hã. Cristu hã uburé ïhâiba'õ norĩ 'madâ'â'wa norĩ nhipai u, te pire uptabi na 're hâimana u'âsi, siwaprosi õhõ si.

¹¹ Zudezu norĩ hã te 're sisihâiwata nhihâri za'ra, 'Re ïhâimana u'âsi mono nhib'a'uwẽ 're ïnomro mono na da te âma 're ïwaihu'u za'ra mono zéb da hã. Tane duré, wa norĩ hã Cristuhu âma oto 're wanomro mono wa, ta hã ma tô wapẽ'e 're wanhimirosa'rata wasété na 're ïwanomro wasété mono zé hã te te wawi 're anhihâri, wawẽ na si oto âma 're wahâimana za'ra mono da. ¹² Â dawabzuri hã 're 'manharĩ za'ra wa'aba mono wamhã, â da te 're asâmra aba mono zé hã, Cristuhu siré 're atâ'â za'ra wa'aba mono zé, te ai'âma simiré'é za'ra wa'wa. Ab're 're, ïsiré da te 're aséme aba mono zéb zama, te ai'âma simiré'é za'ra wa'wa. Ta hã 're anomro 'rata aba mono zé hã oto 're ïrême pese za'ra wa'aba mono zé, te aima wasu'u za'ra wa'wa. Duré Cristu hã dâ'â uptabi nherẽ, ïmama hã tiwaihu'u pese na te te ïhâiwa'utu ne, ma tô duré ïsiré aihâiwa'utu za'ra wa'wa. ïsiré 're aihâiwa'utu za'ra wa'aba mono zé hã 're anomro aba mono zép té, te oto aima wasu'u za'ra wa'wa. 'Re ïhâimana u'âsi mono hã ïwaihu'u pese na asina 're ï'umnhasi za'ra wa'aba mono zéb zarina, ma tô âne hã aima pisutu za'ra wa'wa, taha âma si 're anomro aba mono zép téb da hã oto. ¹³ A norĩ wa'wa hã aipẽ'e 're, 're atâ'â za'ra wa'aba mono ne, ma tô aré 're anomro aba mo, aiwasété si 're 'manharĩ u'âsi za'ra wa'aba mono wa, duré 'Re ïhâimana u'âsi mono nhiti 're aihâimana u'âsi za'ra wa'aba mono wa aré. Taha ré, ma tô oto 'Re ïhâimana

u'âsi mono hã te te aima 're pisutu za'ra wa'wa, 're anomro aba mono zép téb da hã, aipě'ê 're ato sina âma 're anomro u'âsi aba mono da, Cristu hã dâ'â uptabi nherê, apâ te te îhâiwa'utu ne. Taha wa, wawasédé wa te 're î'manharĩ za'ra mono zé hã te te oto wa'âma 're ab'madâ'â mono ô di za, ta hã. ¹⁴ Wawasédé wa te 're î'manharĩ za'ra mono zém na te te aré wa'âma sima îrob'ui'éré za'ra zé hã ma tô te te wama 're aparĩ, wawasété na wa te aré tãma 're îwa'âbâ za'ra mono ô na wa'âma rob'ui'éré hã. Îsimiroti hã wa te wasina âma 're î'uwaimrami za'ra mono ô zarina, wawasété na te te wa'âma 're î'arob'ui'éré mono zé hã ma tô te te wama 're a'uprosi oto. Niha 're îdahâimana za'ra mono zéb da, duréhã te te dama 're î'aroti 'rata mono hã ma tô duré te te dama 're a'uprosi oto. Cristu hã wedepo'o nhonhi'rãmi na wazada îdâ'âzém na ma tô te te wama 're a'uprosi tô. ¹⁵ Uburé hâiwa nho're âma îhâiba'ô norĩ nhiptetezé hã ma tô tiwi uprosi za'ra 'Re îhâimana u'âsi mono hã, dapo're'ô norĩ ma simiroti pire na tãma 're îhâimana za'ra mono norĩ nhiptetezé hã aré. Da'wapéi'wa norĩ nhib'apito hã tinhitob'ru norĩ âma te te ai'uté za'ra wê te, da'ahâ nho'a sisarina te te îsimroi mono ne, ma tô danho'a ta norĩ âma ai'uté za'ra, wedepo'o nhonhi'rãmi na Cristuhu dâ'âzém na hã, Cristuhu ma wapu na 're îhâimana za'ra mono na, uburé da te oto 're waihu'u za'ra mono da.

¹⁶ Áté ni'wam norĩ hã te za âne na te te aima 're roti za'ra wa'wa: “Romnhi hã siwa'ru 're huri aba mono ô di za. Duré uwa 'ru 'râi wa'u îsé hã siwa'ru bâta na 're âhuri aba mono ô di za. Duré sabadu na romhuri zahârizém na 're romhuri za'ra wa'aba mono ô di za. Duré a'amo hã 're pusi mono sidâpâsi, 'Re îhâimana u'âsi mono ma, dato da te

tâma 're 'manharĩ za'ra mono wamhã, te za dame 're ã'madã'â pese za'ra wa'aba mo. Bãdã ahã na pire na dama 're ã'hãimana za'ra mono zama, te za dame 're ã'madã'â pese za'ra wa'aba mo, 'Re ã'hãimana u'ãsi mono ãma 're ãdawata za'ra mono zãb da, dama ãpire mono hã. ãne hã asina tâma ãma 're uwaimrami za'ra wa'aba mono wapsi, te za 'Re ã'hãimana u'ãsi mono hã te te 're aiwẽsãmri za'ra wa'wa." ãne na ni'wam norĩ hã te te aima 're roti za'ra wa'aba mono wamhã, ãma 're saze za'ra wa'aba mono õ di za, dasi'uihã na danhimi'manharĩzẽm hawi 'Re ã'hãimana u'ãsi mono hã te te 're da'awẽsãmri mono dai õ wa. ¹⁷ Da'awã da te 're 'madã'â za'ra mono wamhã, dahãiba uptabi hã dama 're ã'hãimana za'ra mono na te za da te 're waihu'u za'ra. Tane nherẽ, da'awã si hã marĩ ãma 're hãimana mono õ di, ãpire hã. Tane durẽ, danhimiroti zarina uburẽ danhimi'manharĩzẽ mono hã. Marĩ ã'uptabi hã dama ãma 're hãimana za'ra mono õ di. ãwẽ hã za dama 're ã'hãimana za'ra mono zẽp si, te wasu'u. Marĩ ãwẽ uptabi hã, ta hã Cristu te tõ wama wasu'u za'ra, taha si. ¹⁸ ãtẽ ni'wam norĩ hã te za sadawa nhipese na dama 're siwasu'u za'ra, dama wapu na 're ã'hãimana za'ra mono na, 'rãwi 're si'madã'â ze za'ra mono nherẽ. ãtẽ te za durẽ ta norĩ hã hãiwa ãma romhuri'wa norĩ ãma si 're wata za'ra, 'Re ã'hãimana u'ãsi mono upana. Tawamhã ãtẽ ta norĩ hã te za aima roti za'ra wa'wa, ãne: "A norĩ wa'wa hã wasine 're aihãimana za'ra wa'aba mono õ wamhã, 'Re ã'hãimana u'ãsi mono hã ãwẽ uptabi hã te te aima sãmri za'ra wa'aba õ di za. Te za ãsimini za'ra wa'wa." ãne na ta norĩ hã te te aima 're nharĩ za'ra wa'aba mono wamhã, ãma 're saze za'ra wa'aba mono õ di za. Tõ'ã. Ta norĩ hã marĩ aimawi hã dama ãwaihu'u'õ hã sõtõ 'rowim ne, te

te 're ĩsabu za'ra mono na dama 're ĩsiwasu'u za'ra mono na, te 're si'madâ'â ze za'ra, dama pire na 're hâimana za'ra mono newa, 'Re ĩhâimana u'âsi mono waihu'u'õ'wa norĩ nhimirosa'rata wasété zarina. ¹⁹ Ta norĩ hã Cristuhu wasu'uwẽ si te te sima 're tété za'ra mono õ di. Cristu hã uburé tizazei'wa norĩ 'madâ'â'wa te pire na 're hâimana taha si, da'rã hã dahâiba ma pire na 're ĩhâimana za'ra mono ne. Dahâiba na danhorõ 're ĩhâimana za'ra mono hã te dahi hã te te sitẽme 're tété tete za'ra, danhiptete sina âma 're dahâimana za'ra mono da, dahâiba na hã. Tane duré Cristu hã te za tinhib'a'uwẽ norĩ hã te te 're apawapto, ta norĩ hã 're sipawaptob za'ra mono da, siptete sina âma 're hâimana u'âsi za'ra mono da. Te za duré te te 're apawapto, prédup sina âma 're ĩhâimana za'ra mono zém na te te sima 're sa'etẽ u'âsi za'ra mono da, 'Re ĩhâimana u'âsi mono te te tãma 're ĩ'awẽ mono zéb zarina.

Cristuhu siré 're ĩdahâiwa'utu za'ra mono zé wasu'u

²⁰ Cristu hã dâ'â wamhã, 're anomro 'rata aba mono zé hã ma tô ĩsiré aiwi ai'utõrĩ za'ra wa'wa. Taha wa, ti'ai âma danhimiroti zarina 're aihâimana za'ra wa'aba mono õ di za oto, taha zarina 'Re ĩhâimana u'âsi mono te te 're aiwẽsãmri za'ra wa'aba mono dai õ wa. Ta hã tâibã oto. Ta hawi ma tô ĩhawi aiwairébé 'wa. E marĩ da, te bété zahadu âne hã ĩsazei'õ'wa norĩ nhimiroti hã asina 're ĩsazei pese za'ra wa'aba mo, taha na zahadu 're aihâimana za'ra wa'aba mono õ nherẽ. ²¹⁻²² Ni'wam norĩ hã te âne te te aima 're roti za'ra wa'wa, 'Re ĩhâimana u'âsi mono nhimiroti na newa: “Ã hã dasa hã asib'rata na âri õ di za, wasété wa. Duré ã hã téiwei õ di za, asadawa na. Duré ã hã asib'rata na upi tõ. Wasété uptabi

di.” Āne hã te ni'wam norĩ hã dasa na te te aima 're roti wasété za'ra wa'wa, 're upi za'ra wa'aba mono tō da. Tane nherẽ, dasai mono bâ dama 're hâimana hutu za'ra mono di. Taha wa, dasa da te dasiwi 're ĩsawi za'ra mono zém na roti hã tarére duré. Marĩ dai ò di āne hã, 'râwi dasi'uihã na da te dasima 're ĩrosa'rata za'ra mono zé hã. ²³ Dasa na te te dama 're ĩroti wasété za'ra mono norĩ hã waihu'u pese newa, te ta norĩ āma da te 're sasōmri za'ra. Tane nherẽ, ta norĩ hã waihu'u pese na 're hâimana za'ra mono ò di. Ta norĩ hã te āne te te 're dawada'uri za'ra, hâiwa āma 'Re ĩhâimana u'âsi mono ma romhuri'wa norĩ āma si 're dawata za'ra mono da, 'Re ĩhâimana u'âsi mono upana. Ta norĩ hã 'râwi sina 're wata u'âsi za'ra mono nherẽ, te dama wapu na 're ĩhâimana za'ra mono na dama 're siwasu'u za'ra, sadawa nhipese na. Dasa hã te te siwi 're ĩwẽ'õ za'ra mono na te ta norĩ hã te te 're robzépata za'ra tihâiba na, 'Re ĩhâimana u'âsi mono hã taha zarina te te 're wēsāmri za'ra mono da newa. Tane nherẽ, taré uptabi ta hã. Marĩ dai ò di, dasi'uihã na dasai mono bâ da te dasima 're ĩroti za'ra mono zé hã. E dasi'uihã na da te dasima 're ĩroti za'ra mono na 're wahâimana za'ra mono wa, wa za wa te wasina āma 're uwaimrami za'ra, wanhimirosa'rata wasété zarina marĩ ĩwasédé hã wa te 're 'manharĩ za'ra mono tō da. Mare di. Sib'uware di, marĩ da, wama 're hâimana za'ra mono ò wa, ta hã.

3

¹ Cristu hã dá'â uptabi nherẽ, 'Re ĩhâimana u'âsi mono te te apâ ĩhâiwa'utu ne, ma tō a norĩ wa'aba zama aihâiwa'utu za'ra wa'wa, aipẽ'ẽ 're atâ'â u'âsi ne 're aihâimana za'ra wa'aba mono zém hawi, 're anomro aba mono zép téb da hã oto.

Taha wa, ma'āpé ĩwē uptabi hã hãiwa âma asô 're ĩsimi'wara aba mono zô si, 're rob'ruiwapari u'âsi za'ra wa'aba mono za. Tame te oto Cristu hã danhib'apito simasisizéb âma 're sãmra u'âsi pire na, Timama nhimire niwĩ, 'Re ĩhâimana u'âsi mono nhimire niwĩ. ² Hãiwa âma uburé marĩ wē uptabi na 're ĩhâimana za'ra mono na si, te za asima âma 're ĩrosa'rata u'âsi za'ra wa'aba mo. Âme ti'ai âma uburé marĩ 're ĩhâimana za'ra mono na asima 're rosa'rata za'ra wa'aba mono ô di za oto. ³ 'Re anomro 'rata aba mono zé hã ma tô aima ai'utõrĩ za'ra wa'wa oto. 'Re ĩhâimana u'âsi mono âma Cristuhu siré 're anomro aba mono zép tém na da te ai'âma 're rosa'rata waihu'u za'ra wa'aba mono ô di zahadu. E marĩ wa. 'Re ĩhâimana u'âsi mono hã zahadu te te dama 're awaihu'u mono ô wa, âne na hã. ⁴ Cristuhu âma si tô sena 're wahâimana za'ra mono wamhã, taha na si âma 're ĩwanomro mono zép té, te wama wasu'u za'ra. Ta hã nimahã na tinhimirowa'a na ti'ai u apâ wei morĩ wamhã, a norĩ wa'wa hã te za duré danho'a ĩsiré aihâimana za'ra wa'wa, ĩsine aiwē uptabi na 're aihâimana za'ra wa'aba mono na, da te âma aiwaihu'u za'ra wa'aba da hã.

'Re ĩdanomro mono zép té wasu'u

⁵ Ti'ai âma ĩsazei'õ'wa norĩ hâimanazéb zarina, marĩ wasété zô 're ĩrob'ruiwapari za'ra wa'aba mono zé hã te za asiwi 're ĩ'uprosi pese za'ra wa'aba mo asiwi, 're dadâ'â za'ra mono wa, marĩ zô da te oto 're ĩrob'ruiwapari za'ra mono ô ne. Pi'õ na aibâ na zama siwa'ru aiwasédé, 're ĩ'manharĩ za'ra wa'aba mono zé hã te za 're ĩ'uprosi pese za'ra wa'aba mo asiwi, duré asisô 're ĩrowasutu za'ra wa'aba mono zé hã, duré marĩ wasété zô si asima 're ĩrob'ruiwapari za'ra wa'aba mono zé

hã, duré danhipai u asibro pese na 're aihâimana za'ra wa'aba mono da, marĩ zô si asima 're asôpré wa'aba mono zé hã. ãne hã 'Re ãhâimana u'âsi mono ma, wê ô di, marĩ zô ã'upana asima 're ãrob'ruiwapari za'ra wa'aba mono zé hã. Taha wa, te za tô uburé aiwasédé hã asiwi 're ã'uprosi pese za'ra wa'aba mo, aiwi 're si'utôĩ pese za'ra wa'aba mono wa, 're anomro wê wa'aba mono da oto. ⁶ ãne hã dawasété si, da te dasima 're ã'ruiwapari za'ra mono zéb zarina, te za 'Re ãhâimana u'âsi mono hã dama arob'manharĩ za'êtê ãpipa na hã, te te siwi ãda'awê'ô pese zéb zarina. ⁷ A norĩ wa'aba zama ma tô aré ãne na 're aihâimana za'ra wa'aba mo, aiwasété si asima 're ã'ruiwapari za'ra wa'aba mono zéb zarina, aré ãma 're aihâimana za'ra wa'aba mono ré hã.

⁸ Taha wa, te za uburé marĩ hã 're ã'manharĩ wasété za'ra wa'aba mono zé hã ãrême pese za'ra wa'wa oto, 're ãda'ruiwapari za'ra wa'aba mono zé hã, duré asisada 're asiti'ru za'ra wa'aba mono zé hã, duré niha dama 're rob'manharĩ za'ra wa'aba mono da, asima da'ãma 're ãrosa'rata wasété za'ra wa'aba mono zé hã, duré da'ãma 're ãwasété za'ra wa'aba mono zé hã, duré uburé aimreme wasété 'wa hã. ã norĩ hã te za uburé ãrême pese za'ra wa'wa. ⁹ Taré asima 're asadawa nhipese za'ra wa'aba mono ô di za oto, 're anomro 'rata aba mono zé hã 're rême pese za'ra wa'aba mono nherê, uburé aiwasédé 're ã'manharĩ za'ra wa'aba mono zé hã. ¹⁰ Taha wa'rãmi, te oto 're ãdanomro mono zép tém na si 're anomro aba mo, ãwê na. 'Re ãhâimana u'âsi mono, ma tô te te 're aipoto téb za'ra wa'wa aipê'ê 're, ãsine 're aihâimana u'âsi za'ra wa'aba mono da oto, taha zarina ôhõ si 're waihu'u pese za'ra wa'aba mono da. ¹¹ Taha wa, dapoto

mono bâ dasipu'u pese na tâma 're dahâimana za'ra mono nherê, te te siwi 're da'ahâiba wê'ô mono ô di oto, 'Re îhâimana u'âsi mono hã. E marĩ wa. Cristuhu zazei'wa norĩ hã aiwapsi te te 're azawi pese mono wa, zudezu'ô norĩ hã zudezu norĩ me, duré sihâiwata nhihâri ré 're înomro mono norĩ hã, duré sihâiwata nhihâri âna 're înomro mono norĩ hã, duré a'uwê pahĩ norĩ, marãi 'rowi 're îhâimana za'ra mono hã darob amoi âma, duré îwada'uri zarina si pawa'âbâ âna te te dama 're îromhuri za'ra mono norĩ hã, duré wada'uri âna si'uihã na 're îhâimana za'ra mono norĩ hã. Âne hã te uburé îsazei'wa norĩ hã aiwapsi tâma 're hâimana za'ra, 'Re îhâimana u'âsi mono ma hã. Cristuhu si te pire uptabi na wama 're hâimana za'ra, danhipai u. Taha si wama îpire uptabi za'ra hã, wasiré îsazei'wa norĩ ma hã. Taha si te za tizazei'wa norĩ pê'ê 're, 're sãmra, îhâiba mono bâ.

¹² A norĩ wa'wa hã 'Re îhâimana u'âsi mono nhĩb'a'uwê, te tô 're aihâimana za'ra wa'aba mo. Ta hã te te 're asawi pese za'ra wa'aba mono wa, ma tô sima aipisutu za'ra wa'wa, taha ma si tâma 're aihâimana za'ra wa'aba mono da oto. Taha wa, da te 're robzépata za'ra mono wamhã, te za da'âma 're aiwamri za'ra wa'aba mo. Te za duré 're îdapawapto wê za'ra wa'aba mo. Asiré norĩ ma, aipire na 're aihâimana za'ra wa'aba mono na, 'râwi 're asi'madâ'â ze za'ra wa'aba mono ô di za. Ai-waimri te za dama 're aihâimana za'ra wa'aba mo. Duré aiwara sina dazada 're asahi za'ra wa'aba mono ô di za. ¹³ Nĩ'wam norĩ hã asiré nherê, marĩ na te te aiwi 're ro'wa'rê za'ra wa'aba mono nherê, âma 're aiwa'a za'ra wa'aba mono ô di za, ta norĩ âma hã. Duré marĩ na te te aiwi 're ro'wa'rê za'ra wa'aba mono nherê, âma 're 'madâ'â u'âsi za'ra

wa'aba mono õ di za. Wanhîb'apito hã aiwasédé te te oto ai'ãma 're ã'ab'madâ'â aba mono õ ne, ãma 're 'madâ'â za'ra wa'aba mono õ di za, ta norĩ ãma hã.

¹⁴ Danhipai u, dama ãpire uptabi na roti hã, ãne: Te za 're asisawî pese za'ra wa'aba mo. Taha zarina si, te za uburé asiré ãsazei'wa norĩ hã rowê na asiré 're aihâimana za'ra wa'aba mo, aihâiba za'ra wa'wa hã misi ne. ¹⁵ Cristu hã te za te te 're aipawaptob u'âsi za'ra wa'wa, rowê na asiré ãma 're aihâimana za'ra wa'aba mono da. Taha wa, te za aipê'ê 're ãré 're anomro u'âsi aba mo, uburé marĩ hã ã'uwaibaba si ãma 're ã'manharĩ za'ra wa'aba mono zéb da hã, 'râwi asina 're waihu'u za'ra wa'aba mono da. 'Re ãhâimana u'âsi mono hã ma tô aipisutu za'ra wa'wa, simisutu dahâiba misi ne, asiré 're aihâimana za'ra wa'aba mono da, taha zarina aipê'ê 're rowê na asiré 're aihâimana za'ra wa'aba mono da, ãma. Taha wa, te za ãma 're aiwata u'âsi za'ra wa'aba mo, 'Re ãhâimana u'âsi mono ãma si. ¹⁶ Cristuhu wasu'uwê na te za ãma 're asipo're pu'u u'âsi za'ra wa'aba mo, aipê'ê 're aima 're hâimana u'âsi za'ra wa'aba mono da, taha zarina aihâimana wê na 're anomro aba mono zé hã asima 're sa'êtê za'ra wa'aba mono da oto. 'Re ãhâimana u'âsi mono hawî, dahâimanazém na rowaihu ãwê hã ãma 're ãwaihu'u za'ra wa'aba mono zéb zarina, te za dama ãma 're ãroti pese za'ra wa'aba mo. 'Re ãhâimana u'âsi mono hã sôprub uptabi wa, te za tâma 're asô're u'âsi za'ra wa'aba mo, aipê'ê 're ãma 're aiwata za'ra wa'aba mono sina. ãpê'êzani te te aima 're ãwaihu'u za'ra wa'aba mono zém na, te za rowê zarina tâma 're asô're za'ra wa'aba mo, Saumusi na ãbaihâ nhisi na tâma 're ãdanho're za'ra mono zém na zama, duré Wanhîb'apito ãma 're ãdanho're za'ra

mono na zama. ¹⁷ Uburé marĩ hã 're 'manharĩ za'ra wa'aba mono wamhã, duré uburé marĩ na 're aimreme zusi aba mono wamhã, Wanhĩb'apito Zezusihi zadawa para si, te za uburé marĩ hã 're ĩ'manharĩ wẽ u'âsi za'ra wa'aba mo. Tawamhã Zezusi hã ĩwẽ uptabi hã wanhowa te te ĩ'manharĩ wẽ zéb zarina, te za tô marĩ hã 're ĩ'manharĩ wẽ u'âsi za'ra wa'aba mo, Wamama 'Re ĩhâimana u'âsi mono âma 're aiwata za'ra wa'aba mono sina.

'Ri 're, 're ĩdahâimana za'ra mono norĩ ma rotizé wasu'u

¹⁸ Pi'õ norĩ, aimro nhimiroti hã te za 're ĩwapari pese za'ra wa'aba mo, Cristuhu zazei'wa tô sena âma 're ĩhâimana za'ra mono zéb zarina.

¹⁹ Aibâ norĩ, aimro te za 're ĩsawi pese za'ra wa'aba mo. Tâma 're aihâimana wasété za'ra wa'aba mono âna, te za asima 're ĩsawi pese za'ra wa'aba mo.

²⁰ Ai'uté norĩ, aimama nhimiroti te za 're ĩwapari pese za'ra wa'aba mo, ana nhimiroti zama, Cristuhu zazei'wa oto 're ĩhâimana za'ra mono zéb zarina. E marĩ wa. 'Re ĩhâimana u'âsi mono hã te te aima 're wẽ za'ra wa'aba mono wa, âne hã.

²¹ Damama norĩ, ai'ra norĩ ma, ai'aba're na aimreme hã 're sani za'ra wa'aba mono õ di za, ta norĩ hã te te sina 're aimreme wazéb za'ra wa'aba mono wa, tiwi 're robzei'õ pese za'ra mono tã da.

²² Aiwada'uri zarina si, aipawa'âbâ âna dama romhuri'wa norĩ, ti'ai âma asib'apito norĩ mreme hã te za 're ĩwapari pese za'ra wa'aba mo. E asib'apito norĩ hã 'râwi titõmo na te te 're ai'madâ'â za'ra wa'aba mono wapsi, te za romhuri hã tâma 're ĩ'madâ'â pese za'ra wa'aba mo, asimiromhuri na te te 're aiwẽsãmri za'ra wa'aba mono zéb da hã. Mare di. ĩhâiba za're'ra nherẽ, te za tô romhuri

hã tãma 're ã'madâ'â pese za'ra wa'aba mo, Wanhîb'apito hã asiwi 're ãwazéb za'ra wa'aba mono zéb zarina. ²³ Ato sina te za tô tãma 're ãromhuri u'âsi za'ra wa'aba mo asib'apito norĩ ma, hãiwa ãma Wanhîb'apito 're ãsãmra mono ma, ato sina 're ãromhuri za'ra wa'aba mono ne. ²⁴ Aipawa'âbâ aba zé hã hãiwa ãma asô 're ãsimi'wara aba mono hã, Wanhîb'apito hã za te te aima ãsômri za'ra wa'aba na asina waihu'u sirômo za'ra wa'aba wa, te za ãne hã tô sena ti'ai ãma asib'apito norĩ ma 're ãromhuri wẽ u'âsi za'ra wa'aba mo. Tane nherẽ, ta norĩ ma si 're romhuri za'ra wa'aba mono ô di. Ta norĩ u'âbâ, te Wanhîb'apito Cristuhu ma zama 're ãromhuri za'ra wa'aba mo, ta hã Wanhîb'apito uptabi wama 're hãimana mono wa. ²⁵ Ni'wam norĩ hã tiwasété si te te 're 'manharĩ u'âsi za'ra mono wamhã, taha wa'rãmi te za 'Re ãhãimana u'âsi mono hã hã za'ra, nimahã na hã. E marĩ wa. Ni'wam norĩ hã po're'ô na 're nomro u'âsi mono nherẽ, tinhimihâzé te te tãma ba'a waihu'u za'ra ô wa za, 'Re ãhãimana u'âsi mono hã, dama pire na 're ãhãimana za'ra mono norĩ hã, dama wapu na 're ãhãimana za'ra mono norĩ zama.

4

¹ Danhîb'apito norĩ, pawa'âbâ ãna aima romhuri'wa norĩ ma, te za 're ã'manharĩ wẽ u'âsi za'ra wa'aba mo, ã'uwaibaba si. Asib'apito za'ra wa'wa hã hãiwa ãma 're ãsãmra mono hã te te 're ai'madâ'â u'âsi za'ra wa'aba mono na, asina 're waihu'u za'ra wa'aba mono wa, te za ãne na hã tãma 're ã'manharĩ wẽ u'âsi za'ra wa'aba mo, aima romhuri'wa norĩ ma hã.

'Re ãhâimana u'âsi mono ma, 're damreme zusi mono da, rotizé wasu'u

² 'Re ãhâimana u'âsi mono ma, te za 're aimreme zusi aba mo, õne u'âsi. Asimiza'rese te za tâma 're aimreme zusi aba mo, ãma 're aiwata za'ra wa'aba mono sina. ³ 'Re ãhâimana u'âsi mono ma, 're aimreme zusi aba mono wamhã, wa'ãma zama te za duré tâma 're aimreme zusi aba mo, ta hã te te wama 're a'ridawa mono da, ãmreme wasu'u hã wa te dama 're wasu'u za'ra mono da, Cristuhu wasu'uwẽ aré dama ãwaihu'u'õ hã wa te dama 're waihu'u za'ra mono da oto. Taha para, ma tô oto dasiwi ã'âri ni, dazazéb 're, da te ãnherẽ da. Taha wa, wa oto taha 're nhamra. ⁴ Taha wa, ma'ãpé 'Re ãhâimana u'âsi mono ma si, ã'ãma 're aimreme zusi aba mono za, taha si te te 're ãpawaptob u'âsi mono da, Cristuhu wasu'uwẽ dama ãwaihu'u'õ hã ãpibu pese na si te dama 're wasu'u mono da, da te oto ãma 're ãwaihu'u pese za'ra mono zéb da hã, ãhã da si te te ãpisutu wa, 'Re ãhâimana u'âsi mono hã.

⁵ Asimirosa'rata wẽ, oto ãma 're ãwaihu'u za'ra wa'aba mono zéb zarina, te za Cristuhu zazei'õ'wa norĩ ma aihâimana prédup sina tâma 're aihâimana za'ra wa'aba mo. Duré 're danhopêtẽ za'ra wa'aba mono sidâpâsi, te za Cristuhu wasu'uwẽ hã dama 're ãwasu'u za'ra wa'aba mo, dasiré 're aihâimana za'ra wa'aba mono ré hã, da te 're waihu'u za'ra mono ãna 're dahâimana za'ra mono tô da, Cristuhu wasu'uwẽ hã. ⁶ ãsazei'õ'wa norĩ ma, 're rowasu'u za'ra wa'aba mono wamhã, aimreme wẽ na si te za tâma 're ãrowasu'u za'ra wa'aba mo, tâma ãma 're rowẽ zani za'ra wa'aba mono da, aimreme wẽ na te te ãma 're aiwapari ze za'ra wa'aba mono da. ãne wamhã, ã'uwaibaba si te za tô aimreme na

tâma âma 're ĩwa'râmi za'ra wa'aba mo, Cristuhu wasu'uwẽ na te te âma 're asadhanharĩ za'ra wa'aba mono zéb uwaibaba.

Paru hã te te ĩdazawi 'rãsutu zé wasu'u

⁷ Wasisânawã Titicu hã, wama ĩsawi pe hã te za aima ĩwasu'u za'ra wa'wa, âme ĩhâimana na hã. Ta hã wasiré Wanhíb'apito ma romhuri wẽ 'wa, te tô wama umnhasi na 're hâimana. ⁸ Taha wa, wa za oto atême âma satõrĩ za'ra wa'wa ã ĩnhimi'ui'ére ré, âme rowẽ na ĩwahâimana za'ra na te te aima wawasuu wẽ za'ra wa'aba da, taha zarina aima rowẽ wairébé aba da, wazabâdâ. ⁹ Taha siré, te za duré Onezimo hã âma mo, wasisânawã wama ĩsawi pese hâiba amo hã, wama ĩ'umnha hã ta hã duré, tame asiré ĩsazei'wa norĩ, asiré 're aihâimana za'ra wa'aba mono hã. Ta norĩ si te za aima rowasu'u za'ra wa'wa, âme ĩromhâimanazém na hã, duré ĩwahâimana za'ra zém na zama.

¹⁰ Aritacu hã âme dazazéb 're, ĩsiré ĩhâiba hã te âma asawi za'ra wa'wa, timreme na. Marcusi hã te duré âma asawi za'ra wa'wa, Banabéhé mama amoi 'ra hã. Taha na wa tô nimahã na hã aima âma roti pari za'ra wa'wa, niwa atême wisi za'ra wa'aba wamhã, asiwi sawi wẽ wa'aba da. ¹¹ Zuzuwé hã te duré âma asawi za'ra wa'wa, Zusitu na ĩsisi amo hã. Â norĩ hã zudezu na 're ĩhâimana za'ra mono, si'ubdatô ĩhâiba za'ra hã. ĩsiré romhuri'wa norĩ hã ahâ uptabi nherẽ, si'ubdatô si te zudezu norĩ hã te te ĩsiré 're romhuri za'ra, tô ã norĩ hã, 'Re ĩhâimana u'âsi mono, da'âma 're ĩsib'a'uwẽ mono zéb u, wa te tâma 're ĩda'awaiwai mono na hã. Â norĩ hã ma tô siwi ĩpawapto pese za'ra tô.

¹² Epaprasi te duré âma asawi za'ra wa'wa, tame asiré ĩsazei'wa norĩ siré 're ĩhâimana mono hã,

Cristu Zezusihi ma romhuri'wa hã. Ta hã te ai'ãma 're mreme u'âsi 'wa simi'ẽ na, 'Re ãhâimana u'âsi mono ma, taha si te te 're aipawaptob u'âsi za'ra wa'aba mono da, asiptete sina ãma 're anomro aba mono da, duré aihâimana prédup sina 're aihâimana wẽ za'ra wa'aba mono da, ta hã te te aima 're ãwẽ za'ra wa'aba mono zéb zarina si. Cristu hã asina 're ã'umnhasi za'ra wa'aba mono zém na 're asiptete za'ra wa'aba mono da, te duré ai'ãma 're mreme u'âsi 'wa. ¹³ Ta hã te te ai'ãma 're ãromhuri pese za'ra wa'aba mono na, wa tô ta hã ãsi'uihã na waihu'u. Radiseza na 'ri nho'õmo nhisi ãma ãsazei'wa norĩ 're ãhâimana za'ra mono norĩ ãma, te te 're ãromhuri pese mono na wa tô duré waihu'u. Duré Irapuri na 'ri nho'õmo nhisi ãma ãsazei'wa norĩ 're ãsi'ubumroi mono norĩ ãma, te te 're ãromhuri pese mono na zama, wa tô waihu'u, ta hã.

¹⁴ Rucasi hã, dawede'wa wama ãsawi pe hã te duré ãma asawi za'ra wa'wa. Demasihi zama te duré ãma asawi za'ra wa'wa.

¹⁵ Ma'ãpé, duré wasisãnawã norĩ hã wama sawi za'ra wa'aba, Radiseza na 'ri nho'õmo nhisi ãma 're ãsi'ubumroi mono norĩ hã. Duré Nipaha zama wama sawi za'ra wa'aba. Duré taha nhorõwa ãma Cristuhu zazei'wa, siré 're ãsi'rã'õtõ u'âsi mono norĩ zama, wama sawi za'ra wa'aba. ¹⁶ ã hã te ãma aima ãrob'ui'ééré za'ra wa'wa hã asisõ'a asima sôré pari za'ra wa'aba wamhã, te za asiwi ãsõmri 'wa, Radiseza u, tame ãsazei'wa norĩ hã sisõ'a te te duré sima sôré za'ra da. Duré Radiseza u te dama ãrob'ui'ééré hã te za duré ãwa'rãmi aima sõmri za'ra wa'wa, ta hã duré asima sôré za'ra wa'aba da. ¹⁷ Atipuhu ma, ma'ãpé ãne hã 'maiwaihu'u aba za: “Re ãhâimana u'âsi mono, romhuri te te aima ãpisudu hã 'mairẽme õ di za. Uburé te za tãma ãma

ĩ'a'uwaimrami mo.” Āne hã te za tãma ĩ'maiwaihu'u
'wa, Atipuhu ma hã.

¹⁸ Wa hã Paru, wa ĩnhimi'ui'ééré na ãma asawi
za'ra wa'wa. Ma'ãpé ĩ'ãma 're aipo're pu'u u'âsi
za'ra wa'aba mono za, dazazéb 're zahadu
ĩhâimana na hã.

Rowẽ u'âsi 're aihâimana za'ra wa'aba mono za,
Wamama hã ai'ãma 're ĩsiwãĩ za'ra wa'aba mono
zéb zarina.

'Re ĩhâimana u'âsi mono zadawa wasu'u
New Testament in Xavánte (BR:xav:Xavánte)

copyright © 2004 Wycliffe Bible Translators, Inc.

Language: Xavánte

Translation by: Wycliffe Bible Translators, Inc.

Xavánte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavánte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

744f0b3a-210f-53c7-b3a1-39b62617ba0c